Zeitschrift: Schwyzerlüt: Zytschrift für üsi schwyzerische Mundarte

Band: 8 (1945-1946) **Heft:** 1-3 [i.e. 4-6]

Buchbesprechung

Autor: [s.n.]

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. Mehr erfahren

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. En savoir plus

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. Find out more

Download PDF: 23.11.2025

ETH-Bibliothek Zürich, E-Periodica, https://www.e-periodica.ch

Büecherstübli.

Balmer Emil: "Mümpfeli."

116 S. Fr. 4.25. Verlag A. Francke AG., Bern, 1945.

"Dichter und Dänker" seit me mängisch. I sym letzte Büechli bewist der Emil Balmer, daß er au guet und töuf dänke cha und daß er nid Angst het, si eigeti Meinung zha und derzue zstah. Das merkt me bsunderbar guet im Mümpfeli: "Da cha me halt nüt mache!" — Mit em Verfasser bin i au der Meinung, mir chönni halt doch öppis dergäge mache, — we me wott — gäge ds Verwöhne vo de Chind, gäge di modärni Mode-, Tanz- und Sportsucht, gäge ds Verwildere vo üser Sprach, vo üser Art und Gattig. — Au i den andere "Mümpfeli" gspürt me guet, wie der Emil Balmer e wahren und treuje Fründ isch vo üsem Land und üsne Lüt.

Minder guet graten als di churze Prosastück und Gschichtli si d Sprüch und d Värse. Es fählt ne gar mängisch so der rächt Rhythmus und der rächt Schliff, di rächti Musik und Harmonie. Wenn es paar Sprüch doch würken und Idruck mache, so isch es wägem guete Meine, wägem Sinn und Geist, wo drinne läbt, und nid wäge der sprachliche Kunstform. — Der Emil Balmer isch halt und blibt halt bsunders en Epiker, eine wo guet brichten und erzelle cha. Gryfet aber doch härzhaft zu syne "Mümpfeli." Sie wärden Ech sicher gfallen und zdänke gä.

Tavel von Rudolf: Schweizer daheim und draußen.

320 S., Lwd. Fr. 6.50. Verlag A. Francke AG., Bern 1945.

Warum der Verlag der Redaktion vo "Schwyzerlüt" usgrächnet e schriftdütsche Band vom Rudolf von Tavel gschickt het zum Bespräche statt öppe "Gueti Gspane", oder de "Drätti, z'Müetti u der Chlyn" vom Simon Gfeller, wo au grad si früsch usecho, weiß i wäger nid. — Item, mer wei nid so änghärzig si und dä schriftdütsch Tavelband nid azeige, erzellt er doch au läbig und dütlech und ire klaren und subere Sprach — (us däre — wie i dz schriftdütsche Gschichte vom Simon Gfeller — ds heimatliche Bärndütsch gäng wider ufe- und vüretönt) — vo üsne Schwyzerlüt und irne Erläbnis deheime und i der Frömdi. — Wer meh möcht wüsse, söll das schöne Buech nume fräveli sälber i d Hand nä. G. S.

Berner Heimatschutz-Theater. Dereinsblatt.

Under der Redaktion vom Theo Wettstein isch im Wintermonet ds erste Heftli vo däm neue "Vereinsblatt" usecho. Mer wünschen ihm gueten Erfolg, will es sich ja au für üsi Heimatsprach und üsi Schwyzerart und bsunders für üses guete schwyzerdütsche Heimat- und Volkstheater wott isetze. Mer wei au hoffe, es sigi de i jeder Nummer es paar Siten uf Bärndütsch zfinde. "Exempla docent." G. S.

Bula Werner: Die neui Chrankheit.

Bärndütschi Gschicht. Verlag A. Francke AG,, Bärn, 1945, 312 S. Pris 7.80 Fr. (Lwd.)

Es isch e Trost z wüssen und z gseh, wie ds Bärndütsch gäng witers läbig und chäch blibt und neui Schoß und Frücht bringt, we scho di "drei Große", der

Rudolf von Tavel, der Otto von Greyerz und der Simon Gfeller nümme läbe und witerschaffe. (Als "vierte Große" wei mir grad der Emanuel Friedli nid vergässe, wo vor hundert Jahr, anno 1846 isch uf d Wält cho, und wo mir i "Schwyzerlüt" 1946 e chli möchti würdige).

Alli Jahr überchömi mir gäng wider es paar neui und bravi Bärndütschbüecher und Theaterstück, won üs Freud, Chraft und Liecht bringe.

Zu däne, wo gäng guet und tapfer witer schaffe, ghört au der Murtebieter Werner Bula, wo aber ganz im Bärnische deheimen isch. 1934 und 38 het er z erst Churzgschichten usegä ("Der Fürabesitz" und "Neu Chostgänger") — 1941 isch drufahe der Roman "Tue wieni sött" usecho, 1943 het es wider Churzgschichte ("Sibe Wünsch") gäund jitze chunt e großi Gschicht "Di(e) neui Chrankheit" i zwe Teilen und 12 Kapitlen use. — Da cha me de scho nümme säge, d Bärner sigi langsam!

Di "neui" Chrankheit isch eigetlech en alti Chrankheit, sogar en uralti. Wil sie aber gäng wider usbricht, wird sie äben jedesmal wider e "neui" Chrankheit. — Es geit i där Gschicht um en innere Wärt und em üssere Schyn vom Mönsch, um e Stolz und Hochmuet vo junge Mönschechinder, wo wette meh schynen und si als ihre brave Vatter, wo sich dür üssere Glanz und Schyn lö la blende und sälber em Hochmuetstüfel, der Modesucht und der Liederlichkeit tüe verfalle und nüd meh wei wüsse vom altväterische Spruch, ds ehrliche, subere Handwärch heigi e guldige Bode. — Aber der Vater nimmt no einisch ds Hefti i d Hand und dür e chli e "Roßchur" bringt er's zstand, daß di schlächte Schale und das Groß- und Richund Schöntue vo syne Chinder abgheie und ihre guete Chärn natisna wider füre chunt und Meister wird. —

Wie das zue- und härgeit söttet Ihr im Buech sälber naheläse. Der Werner Bula erzellt die Gschicht ganz churzwilig im ne subere, chäche, heimelige Bärndütsch, won Ech gwüß wird gfalle!

G. S.

Achtung!

Der grüen Izahlungsschyn gilt für en 8. Ihg. (1945/46, Ab. Fr. 6.—). — E chline Teil vo den Abonnänte het scho zahlt, di anderen aber no nid. — Mer wär n Ech Dank schuldig, wenn Ihr die Sach no 1945 wetted i d Ornig tue, wäge "Schwyzerlüt" git gwüß scho ohni d Verwaltung, für die mer ganz wenig Int hei, scho Arbeit, Müe, Sorgen und z'schribe gnueg.

Gärn möchti mir "Schwyzerlüt" im ne Umschlag versschicke, dermit d Büechli nid lide. Derfür sötti mir aber no öppe 50 Rp. Zueschlag ha vo dene, wo's vermöge.

Mit ufrichtigem Dank

Euje G. S.